




Selasa, 18 Oktober 2022

Ogen: Kejadian 38:18-30



Tamar



**P**ustaka Si Badia nuratkensa maka Tamar e me permain Juda, anak Jakup. Perbulangen Tamar e me si Er, tapi mate ibahan Tuhan erkiteken ia ngelakoken si jahat. I bas tradisi Israel maka lit lako mangani, e maka anak si peduaken Juda jadi perbulangen Tamar e me si Onan. Tapi Onan pe ngelakoken si jahat iadepen Tuhan maka ia pe mate ka. Arusna anak Juda si peteluken e me si Sela si jadi perbulangen Tamar, tapi mbiar Juda maka seri nge kari nasipna ras kakana ndube. E maka isuruh Juda me si Tamar mulih ku rumah orangtuana alu alasan maka kenca mbelin pagi Sela maka ipejabuken ras ia. Kai si ilakoken Tamar e me guna ndatken hakna i bas ndatken kesusuren arah anak-anak Juda nari sabap ietehna maka Sela nggo anak perana tapi langa ipejabu ras ia (ayat 14). Guna ndatken hakna, Tamar pura-pura jadi diberu perlua-lua guna muat ukur Juda. Daramina kesempatan gelah banci medem ras Juda guna ndatken kesusuren i bas Juda nari. Kenca lit kesempatan e ipakeken tamar alu mehuli, medem ia ras Juda. Kenca si e, ipindo Tamar me jaminen i bas Juda nari e me cincin, bura ras ciken. Kenca piga-piga dekahna maka Tamar nggo mehuli kulana janah Juda pe atena ngukum Tamar seh mate erkiteken nggo ceda lagu langkahna. Tapi alu pentar, Tamar ncidahkan barang-barang Juda piahna Juda ngaku maka Tamar labo salah tapi ia jine si salah. Situhuna kai si ilakoken Tamar enda licik ras erdosa erkiteken ia nidingi bengkilana guna medem ras ia. Pustaka Si Badia labo pernah ngataken maka perbahanen Tamar enda payo. Tapi alu iturikenna gelar Tamar i bas terombo Jesus, maka Tuhan banci erbahan sada si mehuli arah si la mehuli nari. I bas Pustaka Si Badia tersurat maka anak Juda ras Tamar e me Peres. Ia bengket ku bas terombo Tuhan Jesus. Peres banci ikataken anak haram, tapi Jesus nggit tubuh arah terombo si bage rupa. Tuhan labo ngenehen masa laluta si gelap tapi sura-sura Tuhan maka kita keke ras ngendesken kegeluhenta man baNa. Mbue kalak si la mehuli tangtangna, si ndauh arah Tuhan tapi kenca rembak ras Tuhan, ia ipake Tuhan jadi persuruhanNa.